

閩媛典第一百二十一卷

閩節部列傳三

金 周均實妻王氏 王海妻廉氏

按山西通志王氏年十七適周均實越三載夫亡子甫一歲守節五十三年太定元年旌表 按山西通志廉氏王海妻年十七適海夫亡撫幼子守節奉姑飢寒不改年六十有司奏聞大定四年旌表

曹二妻郭氏 史婦趙氏 札刺臺妻蒲察氏

按山西通志郭氏曹二妻年十九適曹生子甫二歲夫亡紡績撫孤五十六年卒大定五年旌表 按山西通志趙氏史姓婦大定間旌表其閭事實無考 按兗州府志蒲察氏東平人懷遠大將

軍札刺臺之妻也以相門子年十七歸臺能執婦道臺死氏猶盛年不忍他適守志四十餘年詔表其門

齊某妻張氏

按永平府志信武將軍齊某妻張氏錦州故工部尙書九思後也適齊封汝南縣君能撫其前子將軍觀史張從旁問將軍重之後將軍卒貞祐初蒙古兵入平灤大掠乃攜家之燕亂平歸家業焚蕩無餘張甘辛苦拮据治家竟能保有宗祀孀居三十年卒及殯執紼送者千人

侯士溫妻李氏

按東路志李氏縉山人歸侯士溫生二子曰進曰慶李年二十四而士溫卒貞祐初元兵起金主徙汴李攜幼孤裹糧以從既渡河僑寓宿州雖顛沛流離必擇師教其子二子亦奮發自立進爲元帥府經歷累遷保靜軍節度副使生子玠慶以材堪將帥起家萬夫長生子瑛後進與慶俱戰死金亡宿境大飢李與孤孫玠瑛同處瀕死者數及入元玠以文學薦爲歸德府丞瑛爲元帥府長史始享鼎釜之奉一日召玠瑛前戒之曰吾爲爾家備嘗艱苦子死國難孫克樹立老死亦奚憾但願爾輩終自勉耳卒年九十一返葬縉山上聞建祠立碑以表其節

元一 周朮忽妻崔氏

按元史列女傳崔氏周朮忽妻也丁亥歲從朮忽官平陽金將來攻城克之下令官屬妻子敢匿者

死時尤忽以使事在上黨崔氏急卽抱幼子禎以詭計自言於將將信之使軍吏書其臂出之崔氏曰婦人臂使人執而書非禮也以金賂吏使書之紙吏曰吾知汝誠賢婦然令不敢違令崔自搥袖吏縣筆而書焉旣出有言其詐者將怒命追之崔與禎伏土窖三日得免旣與尤忽會未幾尤忽以病亡崔年二十九卽大慟柩前誓不更嫁斥去麗飾服皂布敝衣放散婢僕躬自紡績悉以資產遺親舊有權貴使人諷求娶輒自爬毀其面不欲生四十年未嘗妄言笑預吉會治家教子有法人比古烈婦云

李伯通妻周氏

按元史列女傳周氏灤平石城人年十六適李伯通生一子名易金末伯通監豐潤縣國兵攻之城破不知所終周氏與易被擄謂偕行者曰人苟愛其生萬一受辱不如死也卽自投於塹主者怒拔佩刀三刃其體而去得不死遂攜易而逃間關至汴續紆以自給教易讀書有成

王時亨妻郝氏

按曲沃縣志郝氏王時亨妻亨戍絳陽城陷而死氏年二十餘撫孤德融成長後爲金人掠去或勸

氏他適不聽越數年德融放歸以孝行舉爲新邑酒稅監

王仲秦妻党氏

劉英傑後妻吳氏

按陝西通志党氏王仲秦妻延安中部人元統間夫亡子三歲氏年十八治家撫孤其節甚苦年七十三卒

按上元縣志吳氏劉英傑後妻宋知縣季中女年二十三喪夫子慶孫端中皆在襁褓吳誓不他適孝事舅姑教子皆爲儒生年七十餘卒元統間旌表復其家

只魯花真蒙古氏

梁氏何氏趙氏附

按元史列女傳只魯花真蒙古氏年二十六夫忽都病卒誓不再醮孝養舅姑逾一十五年舅姑歿塵衣垢面廬於墓終身至元間旌之其後又有翼城宋仲榮妻梁氏舅歿負土爲墳懷孟何氏大名趙氏並以夫歿守志養舅姑以壽終親負土築其墳高三丈餘

劉應麟妻郝氏

按上元縣志郝氏劉應麟妻應麟祖虎爲宋觀察使自廬州徙居建康嘗統師拒北兵濠之五河矢洞腹達背久之而死妻王氏年始二十餘守志不出戶庭者五十二年其子祐爲監稅官僅弱冠死

妻郝氏年二十一撫應麟守志如姑行五十三年及長娶亦郝氏尤勵婦操麟歿事二姑四十餘年
壽終

薛世榮妻韓氏 呂義妻岳氏

按懷慶府志韓氏薛世榮妻河內人世榮沒時年二十一守節至七十八歲卒至元二年旌表

按萊州府志岳氏昌邑人呂義妻義早亡岳年十八止一子自誓守節撫孤克成至元四年旌表

楊恩妻趙氏 杜氏附

按山西通志趙氏楊恩妻生子彥貞未週歲夫亡家貧苦守奉養孀姑撫育彥貞成立皇慶中旌表
彥貞娶杜氏生子思諭彥貞亦早沒杜年二十四守節如姑有司奏聞至元四年旌表

陶國賓妻許氏 王傑妻盧氏 劉祐妻馬氏

按青州府志許氏陶國賓妻臨淄人至元五年旌表事實失傳 按懷慶府志盧氏溫縣人王傑

妻夫亡氏年二十志行貞潔終始如一至元五年旌其門 按上元縣志馬氏劉祐妻山東人寓

居府城西隅清化坊年二十九喪夫終身續絰以養舅姑年五十餘至元五年旌表

田順妻閻氏

林江妻徐氏

孫謙妻陳氏

按萊州府志閻氏膠州人田順妻年二十四而寡守節終身事舅姑克盡婦道至元七年旌表

按處州府志徐氏名淑林江妻江爲宋鄉貢進士元至元丙子兵入括子定老甫六月避地中山江以兵死徐婦姑相依年三十誓不再嫁訓子登進士第追贈龍泉縣君 按陝西通志陳氏孫謙

妻西安韓城人年十九夫亡守節終身至元十六年旌表

張氏杜氏

杜保二妻孫氏

按荊州府志張氏宜都向遜十世孫存仁妻杜氏仁弟存義妻仁義蚤亡妯娌同守節青蛾皓首始終無異至元十九年詔旌其門 按浙江通志孫氏杜保二妻海寧縣農家女也嫁保二生一男

方孩而保二歿孫氏恪守所志矢死不移勤事女工以佐衣食竟以完節稱至元十九年旌表

楊居寬繼室馬氏

按元明善節婦馬氏傳馬氏參知政事楊居寬之繼室錢塘民家女也至元十四年桑葛奏立尙書省奪中書機要又以計傾罷之先誣居寬等死沒入其帑以馬氏賜衛士馬氏託狂疾叫呼遺矢溺

不可近竟免侵迫楊氏陰贖之歸遂削髮廬墓誓死不嫁後桑葛敗事得昭雪而馬氏以無子乞歸錢塘養親楊氏許之日紡績給食凡十有餘年大德七年十月乳生瘍或曰當迎醫不爾且危馬氏曰吾寡婦也寧死此疾不可見男子竟死時年四十餘

袁天祐妻焦氏

周氏附

按元史列女傳焦氏涇陽袁天祐妻也天祐祖父始皆從軍役祖母楊氏母焦氏並家居守志至元二十三年天祐復從征死甘州焦氏年少宗族欲改嫁之焦氏哭且言曰袁氏不幸三世早寡自祖姑以來皆守節義豈可至吾而遂廢乎吾生爲袁氏婦死則葬袁氏土爾終不能改容事他人衆不敢復言周氏澤州人嫁爲安西張興祖妻年二十四興祖歿舅姑欲使再適周氏弗從曰妾家祖父皆早世妾祖母妾母並以貞操聞妾或中道易節是忘故夫而辱先人也夫忘故夫不義辱先人不孝不孝不義妾不爲也遂居癯三十年奉舅姑生事死葬無違禮其父與外祖皆無後葬祭之禮亦周氏主之有司以聞並賜旌異

霍氏二婦

任氏田氏附

按元史列女傳霍氏二婦尹氏楊氏夫家鄭州人至元間尹氏夫耀卿歿姑命其更嫁尹氏曰婦之行一節而已再嫁而失節妾不忍爲也姑曰世之婦皆然人未嘗以爲非汝獨何恥之有尹氏曰人之志不同妾知守妾志爾姑不能強楊氏夫顯卿繼歿慮姑欲其嫁卽先白姑曰妾聞娣姒猶兄弟也宜相好焉今娣旣留妾可獨去乎願與共修婦道以終事吾姑姑曰汝果能若是吾何言哉於是同處二十餘年以節孝聞又有邠州任氏乾州田氏皆一家三婦俱少寡誓不他適戮力蠶桑以養舅姑事聞並命褒表

張秀妻韓氏

張岳妻丁氏

按涿州志韓氏張秀妻早寡事舅姑極孝安貧守節訓其遺孤始終弗變至元間詔表其墓

按

青州府志丁氏張岳妻益都人歸張未幾夫從戍死丁誓死守志至元間旌表

薛圭妻王氏

杜氏趙氏附

按山西通志王氏薛圭妻早寡子璧甫週歲家貧無倚紡績孝事其姑撫璧成立娶杜氏璧從戍沒杜年二十六歲同姑守節父母欲嫁之杜曰姑守節女豈忍背姑耶璧從弟珍妻趙氏年二十而寡

無子亦守志不嫁事姑孝謹與杜氏均至元間詔旌表

符文進妻李氏

按陝西通志李氏符文進妻西安涇陽人進亡氏年二十六紡績撫子守節終身至元中旌表

廖國器妻陳氏

按贛州府志陳氏寧都廖國器妻年二十八癯居守孤至元更革之際子死於兵婦亦被虜遺孫人俊方七歲陳憐而鞠之時祖姑鄧親姑郭皆在堂陳竭力奉養二姑後郭歿而鄧尤賴孫婦以扶其老得年九十九人俊事祖母亦以孝聞陳年九十餘乃卒詔旌其門翰林吳澂揭傒斯爲詩文表之

楊道妻陳氏

汪三桂妻張氏

任椿妻董氏

按四川總志陳氏郡人楊道妻至元中夫卒守節致和元年楊漢英上其事詔表其門封淑德安人按歙縣志張氏汪三桂妻年二十二而嫁甫五十三日夫亡舅姑皆老張守志撫族子逢辰爲後孝養舅姑皆以壽終至元中有司表其門復其征役按永平府志董氏任椿妻灤州人幼適椿曲盡婦道未三十而椿亡董勵志撫育諸孤元貞三年旌表

徐德妻董氏

按青州府志董氏名法玉徐德妻諸城人夫亾年二十子二尙襁褓未幾翁姑相繼沒氏備棺殮不失禮家貧三喪齊發辛苦萬狀泣訴於鄉好義者憐之皆厚遺助遂得墓碑其墓曰董法玉葬親記
時大德元年十一月

霍榮妻段氏

吳氏趙氏武氏尤氏附

按元史列女傳段氏隆興霍榮妻榮無子卒段氏年二十六養舅姑以孝稱舅姑歿榮諸父仲汶貪其產謂段曰汝無子宜改適霍氏業汝無預焉段曰家資可不計但再醮非義尙容妾思之卽退入寢室引針刺面墨漬之誓死不貳大德二年府上狀中書給羊酒幣帛仍命旌門復役如制又興和吳氏自刺其面成紀謝思明妻趙氏自髡其髮冀寧田濟川妻武氏溧水曹子英妻尤氏嚙指滴血並誓不更嫁有司爲請旌之

陳熙戴妻張氏

賈訥母劉氏

按蘇州府志張氏二娘吳興人嫁吳江陳熙載年二十三夫亡父母憐其無子欲嫁之不從立從子

煥文爲嗣卒年八十餘大德二年旌表

按閩書劉氏行省都事賈訥母寓居本路錄事司大德

二年旌表事實無考

韓筠妻劉氏

按絳縣志劉氏韓筠妻韓劉同里閑居劉年十八歸筠供婦職甚謹至元二年翁病筠求藥療父藥雜草石爲屑筠自運機碾緹軸治藥石墮傷足漏風死明年翁亦亡筠有弟劉卽退居傍舍撫一子二女治絲枲理生業輯有條緒及子婚女嫁仍合娣姒同居始家甚微後浸昌裕過其門者皆嗟異大德三年旌表筠死時劉年二十七癸居六十年

胡鸞妻吳氏

按西路志吳氏胡鸞妻宣府人大德四年鸞歿吳年少母慮其家貧不能守欲更嫁之吳泣曰一身二夫兒甚恥之且姑老子幼兒去誰託也因刺面自誓苦守三十年姑死而殯子亦成立年五十八卒有司奏請旌之

俞新之妻聞氏

劉氏附

按元史列女傳聞氏紹興俞新之妻也大德四年新之沒聞氏年尙少父母慮其不能守欲更嫁之聞氏哭曰一身二夫烈婦所恥妾可無生可無恥乎且姑老子幼妾去當令誰視也卽斷髮自誓父知其志篤乃不忍強姑久病風且失明聞氏手滌溷穢不怠時漱口上堂舐其目目爲復明及姑卒家貧無資傭工與子親負土葬之朝夕悲號聞者慘惻鄉里嘉其孝爲之語曰欲學孝婦當問俞母又有劉氏渤海李五妻也少寡父母使再醮不從舅患疽劉禱於天數日潰吮其血乃愈旣而親挽小車載舅詣岳祠以答神貺

李如忠繼室馮氏

按元史列女傳馮氏名淑安字靜君大名宦家女山陰縣尹山東李如忠繼室也如忠初娶蒙古氏生子任數歲而卒大德五年如忠病篤謂馮曰吾已矣其奈汝何馮氏引刀斷髮自誓不他適如忠歿兩月遺腹生一子名伏李氏及蒙古氏之族在北聞如忠歿於宦家多遺財相率來山陰馮氏方病乘間盡取其貲及子任以去馮不與較一室蕭然唯餘如忠及蒙古氏之柩而已朝夕哭泣鄰里不忍聞久之鬻衣權厝二柩蕺山下攜其子廬墓側時年始二十二羸形苦節爲女師以自給父母

來視之憐其孤苦欲使更事人馮爪面流血不肯從居二十年護喪歸葬汶上齊魯之人聞之莫不嘆息

李四妻茹氏

按河南府志茹氏澠池人李四妻夫早喪誓不再適清苦自持始終無二大德五年旌表

王元壽妻楊氏

按上元縣志楊氏王元壽妻元壽爲沿江制置司計議官死於難楊氏年二十二守節不嫁教其子招孫建孫皆登仕版招孫終溧水州知州建孫任龍興路富州判官楊氏以子封上元縣君大德五年旌表

格忠妻王氏

按榆次縣志王氏舉人格忠妻忠以氏年二十三誓不再嫁豪家爭謀娶氏叱曰吾夫弱冠成名不幸早喪子尙在也誰敢奪吾志耶謀者遂寢大德八年旌表

秦江妻馮氏

趙信妻李氏

按青州府志馮氏益都人秦江妻大德九年旌表事實不傳

按榆次縣志李氏趙信妻年二十

信亡子未一歲李苦節四十年大德十年旌表

帖木兒普化妻于闐氏

按句容縣志于闐氏江淮等處行中書省平章政事阿里別之女贈榮祿大夫大司徒上柱國榮國公帖木兒普化之妻侍御史阿魯忽都之母大德丙午歲帖木兒普化任建康廬州饒州牧馬戶達魯花赤沒於溧水于闐氏居喪執禮以儉率下克完其家詔旌表門閭

朱甲妻郎氏

鄭氏杜氏楊氏附

按元史列女傳郎氏湖州安吉人宋進士朱甲妻也朱嘗仕浙東以郎氏從至元間朱歿郎氏護喪還至玉山留居避盜勢家柳氏欲強聘之郎誓不從夜棄裝奉柩遁柳邀之中道復死拒得免家居養姑甚謹姑嘗病郎禱天刲股肉進啖而愈後姑喪以孝聞大德十一年旌表之又有東平鄭氏大寧杜氏安西楊氏並少寡守志割體肉療姑病

陳汝祿妻徐氏

按寧波府志徐氏名妙梓象山人歸同里陳汝祿事舅姑盡婦道大德丁未歲大侵人相食徐氏盡出奩具易粟以養或采蕨根薺葉以取給厥後舅姑沒停柩於家鄰舍火發衆爭攜筐篋以避徐氏與夫以身捍柩呼天慟哭誓與俱焚火且及左右曳使避不動俄而返風轉火卒全其家人以孝婦稱之

黃善妻張氏

按雲南通志張氏保山人名藥師蓮黃善妻父名開極年十六適善善卒家貧守節撫育遺孤定大德己酉氏年七十一尙無恙定赴京訴其母之貞操詔旌其門授定以鎮撫

鄭伯文妻丁氏

白氏附

按元史列女傳丁氏新建鄭伯文妻也大德間伯文病將沒丁氏與訣曰妾自得侍巾櫛誓與偕老君今不幸疾若是脫有不諱妾當從但君父母已老無他子婦侍養妾苟復自亡使君父母食不甘味則君亦不瞑目矣妾且忍死以奉其餘年必不改事他人以負君於冥冥也伯文卒丁氏年二十七居喪哀毀服既除父母屢議奪嫁之丁氏每聞必慟哭曰妾所以不死者非苟生有他志也與良

人約將以事舅姑耳今舅姑在堂固無恙妾可棄去而不信於良人乎父遂止舅姑嘗病丁氏夙夜護視衣不解帶及死喪葬盡禮事上表其門白氏太原人夫慕釋氏道棄家爲僧白氏年二十留養姑不去服勤續紼以供租稅夫一日還迫使他適白斷髮誓不從夫不能奪乃去姑年九十卒竭力營葬盡姑像祀之終身

王德政妻郭氏

按元史列女傳郭氏大名人少孤事母張氏孝謹以女儀聞於鄉及笄富貴家慕之爭求聘張氏不許時王德政教授里中年四十餘貌甚古陋張氏以貧不能教授二子欲納德政爲壻使教之宗族皆不然郭氏慨然願順母志既婚與德政相敬如賓囑教二弟有成未幾德政卒郭氏年方二十餘勵節自守甚有貞名大德間表其家

朱虎妻茅氏

按元史列女傳朱虎妻茅氏崇明人大德間虎官都水監坐罪籍其家吏錄送茅氏及二子赴京師太醫提點師甲乞歸家欲妻之茅氏誓死不從母子三人以裾相結連晝夜倚抱號哭形貌銷毀師